

四庫全書

集部

欽定四庫全書

集部  
武夷新集卷二

詳校官監察御史<sub>臣</sub>李陽城

檢討<sub>臣</sub>何思鈞覆勘

總校官中書<sub>臣</sub>朱 鈐

校對官中書<sub>臣</sub>葉 茨

謄錄貢生<sub>臣</sub>李 璣圖

欽定四庫全書

集部三

武夷新集

別集類二 宋

提要

臣等謹案武夷新集二十卷宋楊億撰億有  
歷代銓政要略已著錄宋史億本傳載所著  
有括蒼武夷潁陰韓城退居汝陽蓬山冠黿  
諸集及內外制刀筆藝文志所著錄者惟蓬  
山集五十四卷武夷新編集二十卷潁陰集

二十卷刀筆集二十卷別集十二卷汝陽雜  
編二十卷鑾坡遺札二十卷較本傳所載已  
不相符陳氏書錄解題謂億所著共一百九  
十四卷館閣書目猶有一百四十六卷今俱  
亡佚所存者獨武夷新集及別集而已武夷  
新集者億景德丙午入翰林明年輯其十年以  
來詩筆而自序之別集者避讒歸陽翟時作  
也此本但有武夷新集則別集又亡矣別本

或題曰楊大年全集誤也凡詩五卷雜文十  
五卷大致宗法李商隱而時際昇平春容典  
贍無唐末五代衰頹之氣田況儒林公議稱  
億在兩禁變文章之體劉筠錢惟演輩皆從  
而數之時號楊劉三人以詩更相屬和極一  
時之麗惟石介不以為然至作怪記以譏之  
見所著徂徠集中近時吳之振作宋詩鈔遂  
置億集不錄未免隨聲附和觀蘇軾深以介

說為謬至形之於奏牘知文章之不可以一格限矣乾隆四十三年三月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

集部三

武夷新集目錄

別集類二 宋

卷一

詩 格律體一

卷二

詩 格律體二

卷三

詩 格律體三

卷四

詩 格律體四

卷五

詩 格律體五

卷六

頌

記

卷七



序

卷八

碑

表

碣

卷九

墓誌  
一

卷十

金石錄卷十一  
墓誌 二

卷十一

墓誌 三

述

行狀

卷十二

策問

表狀 一

卷十三

表狀二

卷十四

表狀三

卷十五

表狀四

卷十六

表狀五

卷十七

表狀 六

卷十八

表狀 七

書

卷十九

慰 一

卷二十

慰二

祭文

齋醮文



武夷新集原序

予咸平戊戌歲九月受詔知括蒼郡逮十有二月戊子  
耻始達治所凡再更年籥復朝於京師未半載入西臺  
掌誥命迄景德三祀龍集丙午仲冬之七日被召入翰  
林會庚戌詔書許百執事以旬休出沐頗燕居多暇因  
取十年來詩筆條次為二十編目之曰武夷新集蓋山  
林之士不忘維桑之情雕篆之文竊懷敝帚之愛命題  
之意良在是也予亦勵精為學抗心希古期漱先民之

芳潤思覲作者之壺奧而志力淺局襟靈底滯大懼夫  
絕贖於龍文之鼎傷吻於蟻封之埒非不勉也恐致敗  
焉亦由鳬鶴之質自然胡能損益薑桂之性素定豈可  
變遷鴻麗之客當見恕矣輒將假詞大手序以冠篇又  
慮其相先與進掩瑕溢美刻畫無鹽祇足益其陋穿鑿  
混沌彌以喪其真故不避乎厚顏聊援筆以自述云耳  
嘗丁未歲十月晦日翰林學士朝散大夫行左司諫知  
制誥同修國史判史館事柱國號略縣開國子食邑六



百戶賜紫金魚袋楊億序

武夷新集原序

欽定四庫全書

武夷新集卷一

宋 楊億 撰

詩一 六十九首

奉和御製社日詩

仙掌凌空沆瀣秋  
大田多稼似雲浮  
天邊霽景芙蓉闕  
江上殘芳杜若洲  
東觀羣儒宣宴樂  
南荆遺俗重嬉遊  
宸章忽降容瞻覩  
疑是神龜負九疇

奉和御製重陽五七言詩

宸居瑞靄重閭闔正來風  
惻惻驚秋氣豐穰美歲功  
曉煙籬菊嫩宵露畹蘭紅  
重九登高會歡娛處處同

民在華胥正樂康  
高秋賓雁指衡陽  
蒹葭漸見凝清露  
鸚鵡先驚歇衆芳  
節值登高真勝會  
年逢大有是殊祥  
宸心悅豫流新唱  
星漢垂文示八方

奉和聖製南郊禮畢五言六韻詩

燔柴就陽位煙燎達高穹  
掃地鉏甄潔嚴更鼓角雄  
天  
心侔兌悅皇澤比春融  
帝享惟馨德民蘇  
解慍風周郊

四祭重漢時五祠同靈貺昭玄感神光望拜中

奉和御製契丹出境將議迴鑾五言六韻詩

戎輅巡河右天威讐鬼方五營開細柳三令凜飛霜氛  
祲消千里聲明耀八荒靈旗風助順黃道日呈祥偃草  
邊關靜迴鑾海縣康欣陪從臣末歸蹕奉高驤

奉和御製南郊七言六韻詩

潔齋恭已奉蒼旻報本園壇備物陳酒縮楚茅三獻畢  
灰飛嶰管一陽新高空瑞氣長隨輦永夕清霜暗濕巾

泰時迎年嚴漢祀六宗祈福盛虞裡鴻恩渙汗霑窮髮  
睿藻昭回動紫宸庶彙熙熙蒙帝力徒知擊壤効堯民  
奉和御製喜降時雪七言四韻詩

一夕香街布玉塵檀欒勁節露貞筠兔園置酒皇歡洽  
栢殿賡歌睿唱新麥秀原田初望歲花開苑樹忽驚春  
豐穰薦瑞民心悅高下還隨帝澤均

後苑賞花應制

以時字為韻咸平  
四年三月十八日

宮花如錦水連漪翠輦尋芳正是時禁苑定知人未識

朱欄除有蝶偷窺艷烘曉日迷天仗香透輕風落酒卮  
何幸微臣陪鎬宴蓬壺春漏正遲遲

又應制賦射弓詩

以弓字為韻六韻

水漲方塘綠花開禁籞紅同瞻萬乘主親御六鈞弓曲  
應騶虞節春迴太皞功還須殪大兕何只落驚鴻一箭  
天山定三邊虎穴空潯陽射蛟者寧與此時同

後苑賞花應制

以春字為韻成平五年三月

雲羅霞綺媚芳辰瓊圃花開爛漫春風遞清香隨鳳輦

波涵倒影落龍津仙葩四照烘初日濃艷千苞賜近臣  
向晚天街戴歸處遊蜂舞蝶自隨人

宣召赴龍圖閣觀太宗御書應制

五年十月

非煙蔥蔚蒼龍闕紫府深沉大帝居羣玉中天開策府  
神龜溫洛薦圖書珠宮岑寂經行處金簡熒煌拭目初  
曾是先朝受恩者因探禹穴涕漣如

後苑賞花釣魚應制

六年三月十六日奉  
聖旨以芳字為韻

宜春小苑斗城旁錫宴羣仙奉紫皇漢沼乳魚偏傍釣



青陵舞蝶自尋芳，波平鰲背浮崑閬。  
日轉金莖，艷赭黃。滿酌流霞，侍臣醉暖風宮。  
藥雜爐香。

別賦賞花一首

不曾  
進

仙山靈沼五城西，曉日花光照彩霓。  
露濯冰蠶鋪瑞錦，風吹水麝拆香臍。  
芳葩散採添蜂蜜，紅片狂飄雜燕泥。  
曾識壺中舊春色，桃源重到路猶迷。

龍圖閣會宴應制

景德二年四月  
廿一日

冊府藏書在紫微，退朝稽古助論思。  
中天召宴衢樽滿。

乙夜觀文列象垂綵鳳翩翩巢綺閣靈龜天矯冠金碑  
大風發唱羣臣和元首康哉庶績熙

祕閣賜讌送右諫議大夫种放得假歸終南山

應制

瑣闌聊輟早囊封賜告歸尋一畝宮關路蒲輪千里遠  
巖扉蕙帳幾年空百壺天酒凝甘露二雅宸章揜大風  
舊隱暫還非久住心期獻可沃堯聰

初至郡齋書事

到處州  
已後

地去京華遠年逢早暝餘羣胥同黠馬比戶甚枯魚  
照嫗心空切澄清志莫舒焚絲殊未治錯節詎能除  
聽訟棠陰密行春柳影疎賓筵求婉畫僧舍問真如  
踰月窺除目經時絕傳車素餐徒自飽投刃豈曾虛  
盈耳嫌敲扑堆牀馱簿書故園無數舍長日歎歸歟

次韻和十六兄先輩見寄

秋風苦憶鱸霜鱗暫剖銅符出紫宸一路雪寒多挾纊  
幾程山險欲摧輪清香撲鼻梅林近秀色凝眸麥壠新

閉閣草玄終寂寞下車為政尚因循  
尋僧不厭携筇遠愛客寧辭舉白頻  
簿領孜孜防黠吏丘園矻矻訪通民  
魚鹽自與滄溟接雞犬仍將白社隣  
官滿會須拋印綬武夷歸去作閑人

次韻和章子美對雪

破臘連空粉絮飄離離一番長山苗  
旗亭誰氏來沽酒臺笠何人去採樵  
背日旋依松澗積迎風先傍藥畦消  
袁安此際偏無賴獨掩閑門對一瓢

送章頤歸鄉

蕪穢休嗟負郭田  
蹉跎自過鹿鳴筵  
荆山玉璞空三獻  
梁苑風塵已十年  
疏入禁中猶未報  
賦成都下早曾傳  
獨携書劍歸閬嶺  
共汎煙波入楚天  
獵獵酒旗邀舉白  
招招漁艇勸烹鮮  
棹闌勝疑成癖砧  
杵驚愁幾廢眠  
驛路數程煩託乘  
郡齋終日喜談玄  
如何弃我還家去  
相送津亭一黯然

郡齋即事書懷十二韻呈諸官

長樂踈鍾自厭聞漢庭誰不惜離羣舟浮一水波瀾闊

路入千山杳靄分郡閤先憂迷簿領村田聊得問耕耘

疲民深喜猶安堵

去年小儉幸免流亡

黠吏那知便舞文

鹽酒案吏陳元

凱受賕為姦舞文變法其事已敗

照膽求瑕空察察飲冰為政漫云云

玄臺已分嘲揚子桑野須防誚使君別派東傾連漲海

故園西望隔晴氛黛鋪遠岫秋將晚綺散餘霞日欲曛

小檻報春梅爛漫滿空呈瑞雪繽紛題詩到處尋紅葉

置酒終朝看白雲符竹偶分慙出守橐鞬暫佩愧從軍

石渠舊署頻牽夢室有芝蘭閣有芸

郡齋西亭即事十韻招麗水殿丞武功從事

郡齋退食復何為縱目西亭景物奇  
疊嶂雨餘泉眼出澄潭風靜釣絲垂  
城臨古戍寒蕪闊路轉荒村野迳危  
幾處唱歌聞白紵誰家酤酒見青旗  
蝶隨游妓穿花逕犬吠行人隔槿籬  
桃李成蹊春盡後魚鹽為市日中時  
桑麻萬頃晴氛散絲竹千門夕照移  
吟際嶺雲飛冉冉望中隴麥秀離離  
煙迷喬木鶯遷早水滿芳塘鷺下遲

鶴蓋翩然肯相顧主人終宴豈知疲

送張彞憲歸鄉

處處春波滿稻畦海棠零落子規啼一麾遠郡方留滯  
十里長亭又解携後夜灘聲妨客夢初晴雲物入詩題  
到家為問田園事桃李猶應有舊蹊

送韓永錫歸闕

永錫業三傳  
又善小篆

緡雲六載掌關征學得陽冰小篆成逋客幾人曾識面

高士穎川陳  
高君之執友仙山到處便題名桑郊又是乘輶去鈴閣



虛煩解榻迎舊讀春秋究微旨何須苦說不知兵

次韻和致仕李殿丞寅見寄之什因以紀贈

李公

寓居歷陽近徙於洪片

鄉國馳名幾十春鳴臯一旦九天聞翔鸞棲棘曾為吏

金鼎調梅未致君百里象雷嫌碌碌

公嘗權歷陽縣政

片言折

獄厭云云

公任三衢司理數考

詩名已是齊康樂筆力何曾減右

軍抗表忽然干鳳宸拂衣殊欲謝人羣都緣梁苑慵為賦且免鍾山被勒文清夜獨吟牛渚月高秋時望帝鄉

雲鯉庭稟訓門逾盛蘭畹傳芳氣益薰盡室遠依洪井  
側直鉤猶釣楚江濱西山有藥應須餌待看蜺旌入紫  
氛

京師故人有以隴西鸚鵡遺予者因畜養之去  
年出守縉雲提挈而至性靈甚慧觸類能言  
公退翫之常若不足忽遇疾而逝因命瘞於  
小園作詩一章聊以追悼識者無罪予以貴  
畜也

隴山秋樹舊巢傾  
遠向江東逐旆旌  
去國夢魂應繚繞  
入春喉舌漸分明  
一聲警露何慙鶴  
百轉遷喬肯讓鶯  
終日雕籠心不戀  
經年丹紫色猶輕  
思歸悵悵因成疾  
顧主依依尚有情  
死葬小園芳草地  
夜來經雨綠苔生

麗水甄殿丞移疾請告

數日不逢黃叔度  
胷中鄙恠一時生  
如何民瘼偏能瘥  
却是詩魔未得平  
夏景清和妨命駕  
玄臺寂寞阻飛觥  
欲親高論無由得  
須作文殊問疾行

戚上人

五蘊已空諸漏盡家間行道十年餘吟成南國碧雲句  
讀徧西方貝葉書清論彌天居士伏高情出世俗流疎  
問師心法都無語笑指孤雲在太虛

次韻和係郡齋書事之什

係今名化

竹使貪為郡金門懶上書征途沿木合

緡雲有木合嶺若蜀道之棧閣

也官舍類樓居

郡齋香在山頂平地甚狹四面多構亭榭以翼之

密葉藏啼鳥

澄潭躍戲魚波光搖島嶼霽色露閭閻圓蕙光風

拂山苗淑氣噓開樽空愛客函丈孰宗子清唳頻思鶴

長鳴幾厭驢

王武子雅好驢鳴子素所不喜

顏貧一瓢足嵇懶尺題踈

薄宦無勞說長謠任所如神明定來舍莊室正虛虛

### 次韻和章頤見寄

雞窓十載共論文蘭室依然有舊薰  
雨雪共拋修竹苑煙霞獨訪武夷君  
隨珠照乘元無類天驥追風定不羣  
犬子賦成猶未獻飄飄詞氣已凌雲

孫及歸吳興

生近遊永嘉

家在雲溪傍汀蘋遶舍香草玄偏寂寞為客苦恓惶澤  
國聊傾盖春闈早擅場咳蘭行可採月桂自應芳稅駕  
臨滄海迴轅指大梁裂裳趨遠道負米及高堂季子裘  
雖敝安仁鬢未蒼明年杏園裏輒莫負春光

已亥年郡中夏旱徧禱羣望喜有甘澤之應

旱魃偏為虐陽烏益以驕何曾柱礎潤惟恐土山焦請  
禱彌增潔陰靈亦孔昭雲興不待族風細欲鳴條隱鱗  
雷車轉霏微雨足飄層陰低匝野鴻霈近連宵庭樹含

佳色村田長善苗，  
蘚痕緣屋壁，  
泉脈吐山椒。  
轍鮒那憂涸，  
園蔬豈待澆。  
官渠逗水急，  
客路裹塵銷。  
掾吏階前賀，  
耕夫隴上謠。  
秋成知有幸，  
歲欲近玄枵。

寄章徵君

水陸都無數，  
舍程魚符龜印苦。  
相縈夢魂長繞龍門坂，  
姓字終懸月旦評。  
鮑室清琴應獨撫，  
融樽淥醕共誰傾。  
春深詩石苔衣駁，  
雨過書齋草帶生。  
鴻寶枕中初得術，  
丹臺籍上已題名。  
清談宛有南朝體，  
嘉遯全忘北闕情。

金馬深嚴堪避世，滄浪清淺未沾纓。諸儒正議明堂事，  
軋軋蒲輪即奉迎。

次韻和衢州席刑部早秋

朱火熒熒向夕流，林間一葉忽驚秋。風來野渡聞漁笛，  
霧斂晴天見蜃樓。艷愛芙蓉開幕府，香憐杜若老汀洲。  
使君鬢畔多玄髮，臨水登山不用愁。

次韻和席衢州憶洛陽春遊十四韻

周漢經營跡未遐，山川形勝最堪嘉。前瞻闕塞千尋出，



旁逗伊流一派斜子晉鳳笙調夜月宓妃羅襪映朝霞

洛神賦云遠而望之  
皎若太陽昇朝霞

何人貰酒青樓曉幾處尋春紫陌

賒駿足每從金埒試芳叢多展翠帷遮出逢勝境爭飛  
蓋歸逼殘陽競走車庭竹惹煙披嫩籜臯蘭裛露長新  
芽嵩峰嶠嶂疑摩斗洛水清泠欲見沙萬井閭閻真陸  
海九重宮闕是天家禁林日暖空啼鳥御苑風微自落  
花關路行人偏絡繹津橋賈客苦諠譁何當獻賦論還  
鼎便欲拋官學種瓜江海三年勞夢想田園二頃有生

涯應知父老沾堯化長挈壺漿望翠華

聞道卿途中授計司判官

罷東陽得告歸泉州寧覲行至建安而有

是命

幾年華省冠名曹歸棹寅緣入海濤纔奉色難馨夕膳  
便將心計析秋毫政成婺女生祠在地近明光伏奏勞  
夜直乍諳綾被暖晨趨頻見露盤高共期晝日承三接  
莫許秋風長二毛為郡今來最卑肩勸君休更夢懸刀

郡齋西亭夜坐

涼颿初拂衽皓魄正當軒宿鳥林間定流螢草際翻蒼  
茫迷野色嘲啗辯方言角罷重城揜漁歸別浦喧斷蛩  
吟壞壁寒杵出遙村樹影成帷密灘聲激箭奔夜長風  
露冷川迥水煙昏對景都無寐冥心契混元

秋晚

秋晚彌岑寂天空見汰寥溪流拖白練樹葉翦紅綃露  
菊英初吐霜鍾韻漸調清光開旭日旦爽氣逐驚颿鷹擊  
秦原迥鴻歸楚水遙星高漢將出膠折敵兵驕元亮田

多廢安仁鬢恐凋功名殊未立對景自無憀

送温州聶從事赴閩

從事先自此  
郡移任永嘉

佩鞬來海上七見歲星移務劇操刀割書成挿羽馳詩  
傳百越徧詔下九霄遲束帶朝闔闔歸艫汎渺瀟舊遊  
聊稅駕雅飲且軒眉鄭驛歡相接牙絃辱所知病驚瓊  
樹瘦醉露玉峰奇上馬便西笑何須訴酒卮

送章安世赴舉

螢燭辛勤十載餘藹然高價滿州閭一枝未折仙人桂

千里又隨鄉老書梁苑雪花成賦後禹門雷鼓化鱗初  
山城日日望春牂莫遣南來音信疎

偶興

芳蘭滋九畹蕭蒿亦旁植威鳳翔丹山鵠臬猶接翼雅  
琴歌南風蛙鳴不容息驪珠媚清川魚目光激射薰蕕  
豈同器雲壤自懸隔咄咄來逼人薨薨止于棘發跡由  
屠沽操心希桀跖天形固殘毀吏曹嘗擯斥很羊遠刀  
机黠馬委銜策心同溪壑險惡比丘山積天聽本聰明

神道尤正直當用禦魑魅豈今為鬼蜮春喉魯陽戈鈞  
頸子雲戟肉委餓虎蹊屍投窮髮北饑鷹礪吻啄猓  
磨牙食魂氣繫鄴都膏血塗荒磧去草絕本根決疽恣  
鍼石所居必污渚遺種盡剝剔渠魁已殲殄非類彌怵  
惕狼莠既芟夷善苗漸滋殖君子益知命視履如平昔  
小人競革音滅身在漏刻堯民率可封湯網從此釋永  
躋仁壽期共造華胥域

到郡滿歲自遣

迢遞分符竹因循度歲華  
地將鯨海接路與鳳城賒  
觸石雲頻起銜山日易斜  
潮平聚漁市水落見人家  
吏隱偏知幸民謠豈敢誇  
無嫌勾漏僻且得養丹砂

己亥年十月十七日大雪

六出俄呈瑞三農始告休  
兔園陳旨酒金屋御重裘  
瓏麥青猶短臯蘭紫尚稠  
嚴飈一夕起瑞霰滿空浮  
林迥瓊花吐峰孤玉笋抽  
疏鱗鏤屋瓦淨練曳溪流  
北戶寒威盛南方沴氣收  
時和人富壽卒歲好優游

郡中即事書懷

海隅為郡真卑屑，簿領沉迷筆楚喧。  
王事更逾星火急，吏曹何啻米鹽煩。  
甘棠聽訟曾無倦，丹筆書刑幸不冤。  
境上送迎暫置驛，齋中宴喜懶開樽。  
逢人未免腰如磬，議政常防耳屬垣。  
鮑臭恐將羣小化，蟲疑難與俗流論。  
却思寂莫棲天祿，爭得逍遙似漆園。  
外地麤官如竹葦，一麾出守豈堪言。

次韻和潤州劉度支見寄之什



卜隱林泉未有期  
春田耕事欲憑誰  
一辭左掖駕鸞侶  
兩見南州橘柚垂  
酌醴不妨留客醉  
飲冰長是畏人知  
頒條求瘼無他術  
深恨期年報政遲

郡民以歲稔刑清  
相率為齋以報善政  
永嘉聶從事賦詩紀其事  
因依韻足成一百言以謝之

為郡臨甌越  
雲泉興未乖  
歡謠乏襦袴  
歸思滿荆柴  
偶遂豐年望  
潛將樂土偕  
流民爭襁負  
兇黨絕椎埋  
精力

姦多露清心政自諧羣生不疵癘比屋已綏懷輒詣金  
人宇同修香積齋漫勞歌邵父方待拍洪崖治行非尤  
異傳聞及等儕雕章忽垂贈屬和愧淫哇

歲暮有懷

遠辭金虎觀來守縉雲城鳴律行將盡枯荻又向榮匏  
瓜宣父歎江海子牟情求瘼曾無術投虛豈有聲帝鄉  
成久別天吏苦遙征漫貯青霞想唯愁素髮生澄清慵  
攬轡蕪穢欲歸耕簿領非吾事丹臺有姓名

次韻和酬永嘉聶從事除夜之什

三百六旬今夜盡寥寥虛室獨凝神蓮城五鼓欲催曉

按圖記郡城號蓮華城

梅嶺一枝先報春鄒律漸吹陰谷暖堯蓂

看傍土階新海隅留滯年華長坐對寒缸浩歎頻

章徵君見和所寄詩再次本韻酬贈

武夷山秀建溪清身隱心閑事不縈前古是非為已任

故鄉人物與誰評勸農春隴巾頻折逢客秋郊蓋暫傾

綵服趨翔娛壽母

詩頌曰魯侯燕喜令妻壽母

絳帷談論誘諸生頽

流洗耳殊非達谷口躬耕亦近名博奕自堪銷永日絲  
桐兼得助高情莫嫌霜雪將侵鬢須歎塵埃漸滿纓早  
晚鳴騶催上道聖君虛左欲相迎

中春喜雨

土膏初脉起東作向農時隱鱗雷車轉霏微雨足垂龍  
蛇爭奮躍桃李漸離披流潤先從葉餘波更及私謳謠  
耕父喜滲漉稻畦滋連夜空階滴愁吟水部詩

聞北師克捷喜而成詠

歲晏增冰合煙塵起朔陞文昌先命將羽檄便徵師天  
迫星狼滅宵寒月魄虧前軍臨瀚海後騎縛閼氏薊北  
飛沙靜河南露版馳遼陽諸父老重覩漢官儀

洞溪慶道人歸上都

近之歷陽雖久寓  
縉雲不與郡民接

精廬宴坐十經秋  
鉗鉢近為千里遊  
又是浮杯過滄海  
便應飛錫入皇州  
彌天談論降時彥  
結社因緣背俗流  
此去定知諸念息  
只除魂夢到東甌

春郊即事

金匱要略卷一  
黃鸝百轉宿煙疎近郭行春獨駐車  
隴上勸耕聊問訊  
崇陰聽訟且躊躇  
遠林桑盡蠶成繭  
野水萍開鰕趁魚

幾處路旁垂苦李  
游人折意何如

### 偶書

朱輪遠守未成歡  
薄宦令人意漸闌  
郡閣政清慵按吏  
鄉園路近欲休官  
梅花遶檻驚春早  
布水當簷覺夏寒

已是三年不聞問  
如何歸去把漁竿  
太常李博士史館孫祕丞相繼奉使浙右博士

至郡以孫侯詩三章示予且以致意因次韻

和酬

時孫不來

迅瀨拖舟上危梯躡屐登山光翠欲滴水氣熱如蒸路  
轉藤蘿暗天開物象澄丘園足逋客應得薦賢能

分憂從漢殿捧詔出蕭牆路入三吳遠舟浮一水長詩  
題石門側夢徹斗城傍清曉見雲物依依認帝鄉

北極分憂矚東甌布惠和曾蒙傾蓋分偶得枉帆過鄭  
驛非常速融樽復幾何孫侯不假道鄙我信為多

麗水甄殿丞手植朱李繁實盈枝折以貺予感  
而成詠

五年為邑鬢霜侵吏隱由來得趣深不獨絃歌長滿耳  
兼聞桃李已成陰晨昏我有南陔戀江海君懷北闕心  
早晚飛沉俱遂志願將初服敵華簪

聞揚州柴給事有弄璋之慶寄詩賀之

給事年六十六

始有嗣子

華堂何夕夢熊羆衛氏如今有一兒三日懸弧應是喜



千年結實未為遲  
預知駟馬門閭盛  
暗想天麟骨法奇  
曾忝門牆攝齊者  
待看孔鯉學聞詩

題張濟所居壁

濟予之姻此  
後自郡歸鄉

三張舊族富英髦  
仙墅重經散鬱陶  
深喜太丘家法在  
須知定國里門高  
分題每日搖雞距  
合宴常時把蟹螯  
獨感戴侯恩未報  
徘徊不覺涕沾袍

留題南源院

路入藤蘿十里餘  
松窓瀟洒竹房虛  
驚巢新舊金人殿

蟲網縱橫貝葉書當畫風雷生洞穴欲齋猿鳥下庭除  
昔年曾此題詩句猶拂流塵認魯魚

留題張彞憲池亭

彞憲昆仲三人皆  
好學季弟逝矣

瀟洒危亭枕碧池昔年飛蓋此追隨正逢五綵承顏日  
兼是三荆並秀時夜坐不知銀漢沒春遊長訴玉杯遲  
如今罷郡重登賞喜見扶風舊白眉

別聰道人歸縉雲

聰送予  
至別墅

二年假守枯蒼城郡榻唯師即送迎擣藥幾憐春漏永

調琴長待夜蟾生心猿已伏都無念海鳥相逢自不驚  
送別秋郊豈成恨白雲青嶂是歸程

題張居士壁

疊巘參差翠遠門雕梁賀燕自成羣殺雞日夕期嘉客  
種竹寒暄對此君且向東臯輸黍稷便應北闕降玄纁  
子真漫說耕岩石不奈聲名四遠聞

留題黃山院

未忝離離一逕通遊人攬轡即過從  
赴齋幽鳥聞疎磬

出定高僧見偃松夜靜龕燈凝古殿雨餘巖溜迸前峰  
昔年曾此題名處素壁歌斜翠蘚重

題弟晦所居壁

今名  
續

制宅何其巧連山復帶溪芳樽長有酒嘉樹自成蹊學  
舍祥鱣墮歌梁賀燕迷調琴明月榭繫馬綠楊堤好時  
田園美南華物我齊終當解簪組同此味天倪

留別桐城主簿

昱  
此後赴闕

早曾兔苑傳詞賦屈在桐鄉勾簿書簿宦交朋嗟絆驥

清貧人吏說懸魚二年領郡睽離久一夕當樽鄙恠祛  
苦恨秋風動行色徘徊無計駐征車

行次潁州值雨留駐數日因貽郡守祕閣刁公  
夢想蒼龍闕盤桓汝水濱郡侯偏愛客秋雨更留人饌  
盛嘗鱸膾樽空倒角巾羈愁不能遣唯恐二毛新

旅中重陽有懷鄉國

嘉節臨重九羈遊託異鄉萸房誰繫臂菊蕊懶浮觴  
野渡賓鴻急村田晚稻黃悲秋更懷土只恐鬢成霜

重陽日憶遠

逆旅重陽節窮秋萬里身金英浮酒盞珠泪濕衣巾為  
客飄蓬遠思家落葉頻只應蝴蝶夢夜夜得相親

代答

征車苦迢遞節物感愁辛已入授衣月那經落帽辰金  
樽難獨酌寶瑟任生塵把菊流雙泪誰知憶遠人

武夷新集卷一

欽定四庫全書

武夷新集卷二

宋 楊億 撰

詩二 七十首

戲贈潁州萬壽尉吳待問

待問予之故人  
值雨留憩數日

宦途南北最情親  
歲晏相逢潁水濱  
舊日青衿同學校  
暫時黃綬困埃塵  
樽中滿酌香醪美  
門外高懸綵棒新  
鷄黍留歡已慵發  
可堪經雨折紗巾

題顯道人壁

住萬壽縣精舍二十年矣

心似寒灰不復然尋常談論即彌天門臨潁水多年住  
法自曹溪幾世傳儒士誰同翻貝葉都人長見施金錢  
翰林詩版分明在曾與吾家有舊緣

故侍讀尚書有贈先師詩著之于版

史館阮比部知衢州因歸建陽別墅二首

比部兄昭

濟隱居

不仕

再入蓬丘席未暖飄飄又建隼旗行交朋莫惜河梁別  
鄉曲初期畫錦榮竹箭波聲隨一棹斧柯山色對雙旌  
子牟江海心應在頻上高樓望帝京



少小鄉關振大名，武夷山翠落門庭。  
郎君近折仙人桂，伯氏高分處士星。  
城郭遼東應改易，芝蘭謝圃自分馨。  
吳民正待隨車雨，莫苦淹留醉醪醅。

集賢宿直寄中書李梁二舍人

耿耿銀釭照直廬，西風黃葉滿庭除。  
愁心不忍聞賓雁，病眼猶能拾蠹魚。  
欹枕微吟空展轉，遶廊閑步自躊躇。  
銅龍漏滴傳鈎盾，玉兔光芒射綺疏。  
薄宦久淹滄海郡，故交多入紫垣居。  
洛陽已在拜塵後，宣室那逢膝席初。

投閣寂寥深自愧抱關憔悴擬何如寧思西掖五花判  
且補河東三篋書桑梓任拋萬里外蓬萊試住十年餘  
釋之不調嵇康懶終待休官學灌蔬

翰林王學士奉使兩川

萬里征西頻告捷九重喻蜀正裁書忽聞召對浴堂殿  
元是親乘使者車井邑凋殘經亂後軍城鼓舞拜恩初  
銅梁迢遞驅騶騎玉署深嚴鑱直廬星厯更須占李邵  
雪園應恨欠相如歸來便在三台席轉與交親禮數踈

董給事知洪州

豫章南國一都會夕拜東臺最上流  
捧詔暫辭青鎖闥携家便汎木蘭舟  
褰帷聽訟民謠洽解榻延賓主禮優  
只恐徵黃在朝暮西山靈藥未容求

梁舍人奉使巴中

藥署深嚴纔草詔劍關迢遞忽乘輶  
霜天歷歷巴猿苦山路駸駸作馬驕  
梁苑寒風吹別袂瞿塘春水送歸橈  
紫垣遣使非常例應有星文動九霄

次韻和族弟日華寄編修諸學士之什

鑠闡漫喜塵通籍蓬巷無人肯顧廬天祿解嘲纔答客  
集仙置使又修書非煙繚繞縈珠網流水潺湲逗石渠

漢石渠署  
因渠得名

何必銀臺號三昧此中更好味真如

次韻和光祿黃少卿學士感恩書事十六韻

江夏門風盛東吳族望高才雄吐白鳳志大釣靈鼉昔

日參珠履

嘗任淮海  
王記室

多年汎碧桃陳琳巧書檄謝客占

風騷曲宴飛三雅沈機佐六韜玳筵頻岬幘梲鼻幾揮

毫託乘同歸闕臨軒別賜袍未離王儉幕獨得呂虔刀

粉署因敷歷朱門更鬱陶淮南荒桂苑騎省泣霜毛

已上

並叙少卿昔在淮海府中及感舊之意

去國踰千里為郎歷幾曹和鉛兼

秘府懸磬寓神臯室靜秋生白庭間雨長蒿禁林俄召  
試卿寺果垂褒道在心無悶恩深首重搔依前領圖史  
紉繹肯辭勞

次韻和史館盛學士朝退書懷之什

金壺待傳點瑤瑋初辨色闢仗開天閣垂旒操斗極百

辟瞻堯眉九州蒙禹力朝政無闕遺諫官慙曠職

次韻和盛博士寄贈李西寺丞因以述懷

錢郎滿腹貯精神坐上詩成壓倒人相識只從拋竹馬

愚初至上都遊歷門館纔十餘歲

留歡長是鱸金鱗西園宴喜期清夜

曲水追隨約暮春不到門牆欲旬浹已應懸榻滿埃塵

次韻和盛博士寄贈虞部李郎中之什

門墻日以峻德望闇然彰弟草西垣詔身為南省郎塤

箎歡並奏龍虎儼成行宴客牛心炙朝天雞舌香曲池

春漲水碧瓦曉飛霜此景知何事留賓汎羽觴

次韻和守邦道人寄編修諸學士之什

修書何幸佐鉛黃日接羣英道自光署近承明叨謁帝  
賦成平樂謬為郎孟堅已分酬賓戲嚴助還思佩郡章  
共憶東林社中客滿池蓮葉吐清香

大名府大安閣主道者

上幸魏郡親至  
其寺面賜紫

釋子修行與衆殊銅臺連接起精廬羣公共結二林社  
萬乘曾迴六尺輿衣惹天香親御座閣成雲構倚晴虛

浮生自恨猶貪祿未得同翻貝葉書

次韻和盛博士寄許州任從事之什

射策曾攀郤桂枝從軍猶賦仲宣詩陳琳草檄應非久

貢禹彈冠素有期

任與盛君有推挽之約

梁苑勝遊思霰雪潯陽

舊隱廢茅茨

任寄居星灣多歷年所

初筵樽斚不須戀正好公車

自薦時

次韻和盛博士雪霽之什

六花新霽白皚皚爽氣颼颼拂面來梁苑酒濃寒力減



謝池風細凍紋開  
天邊幾陣聞歸鴈  
江外千家見早梅  
此際何人能訪戴  
剡溪清景好銜杯

次韻和太僕錢少卿寄贈編修主人宋承旨李  
舍人之什

春官宗伯魯諸生  
翰苑綸闈占大名  
一代典謨資潤色  
滿朝文物仰懸衡  
分班月殿趨金馬  
侍宴天池見石鯨  
即日雲屏應隔坐  
鄭弘任太尉舉第五倫為司空每見  
曲躬自卑詔置雲母屏風分隔焉  
不須東觀待書成

宋殿丞廣南東路轉運

天子憂南越公卿薦陸生九年須富國萬里便揚旌封  
部諸蠻接官曹六尚榮交州何日到鼓吹定相迎

次韻和中書李舍人勉元氏道宗奉宗兄弟之  
什

二難文彩少人過落筆尋常只患多兔苑暫遊衝霰雪  
龍門曾上困風波一囊負米猶為客百步穿楊待決科  
更得詞臣贈詩句機雲入洛擬如何

送僧之棣州謁王工部

雪晴河水正流澌風卷驚蓬滿眼飛客路飄飄携一錫  
禪房寂寂掩雙扉曹溪衣鉢何年得廬阜香燈幾日歸  
賢守相逢膜拜後都人爭勸施珠璣

次韻和錢少卿早春對景有懷諸學士

草樹欣欣暖律迴謝家池沼凍紋開晴天獨向高臺望  
春色先從上苑來且待郢人歌白雪莫聽羌笛怨殘梅  
乞逢休沐便須去引滿何曾訴玉盃

閣門廖舍人知袁州

舍人故連州刺史凝之子  
凝與弟融皆擅詩名於江

表

駸駸五馬動征塵  
太守風流世絕倫  
身事漢庭為小相  
家傳楚國是騷人  
煙波莫歎重湖遠  
桑梓仍將別墅鄰  
麥穗微黃稻苗綠  
朱轡入境便行春

次韻和李舍人拜命書懷寄館殿舊僚之什

拜命入星垣  
偏承聖主恩  
黃扉陪漢相  
彩筆代堯言  
佩玉天顏近  
羸金世望喧  
下僚今隔品  
雲路仰高軒

上元夜會慎大詹西齋分題得歌字

帝里風光上元節烏衣舊巷喜經過樽中酒渌寧辭醉  
梁上塵飛只欠歌坐聽禁城傳玉漏起看河漢轉金波  
主人愛客春宵永彩筆題詩奈樂何

次韻和主人喜諸客見過之什

金鴨噴香繞燭臺輕雲散盡月光來三千賓客連宵醉  
十二城門徹曉開何幸紫微容託乘更煩紅袖與傳盃  
明朝猶自放朝謁心喜當關不見催

坐中朱博士言今荆南張諫議典襄陽日嘗留  
意一妓公頗畏內終不得近及移郡荆渚泣  
別郵亭乃為歌詞流布巴郢予感其事賡而  
成詩

駸駸五馬江陵去寂寂雙娥漢水頭一曲歌終眉黛斂  
十分酒盡淚珠流陽春郢客傳新唱暮雨高堂夢昔遊  
瓊樹無人敢親近章臺京兆不勝愁

次韻和慎詹事述上元宵會之歡寄諸同舍之

什

休沐忻逢上元節華堂高宴且盤桓  
戎冠屢舞人多醉  
刻燭狂吟夜向闌  
月上珠簾侵坐白  
霜飛碧瓦透衣寒  
銅壺漏徹東方曙  
歸騎紛紛未盡歡

次韻和李舍人立秋祠太一宮宿齋書事之什

太一祠宮肅齋居薦至誠已將茅縮酒應用麵為牲

梁武

祭宗廟用  
笋脯麵牲

月映金天朗風來玉宇清  
玄談知理勝蔬食

覺身輕仙馭排雲下  
空歌遠殿聲仍聞得丹訣  
簪紱頓

忘情

同諸公寄閬州隆靈山王處士

玄晏先生早著書聖朝未降輓輪車滿頭霜雪機心息

三徑蓬蒿俗客踈千首好詩傳輦轂一枝仙桂耀門閭

其子近年  
登進士科

漢庭得意真知己應為清宵誦子虛

今樞密  
學士陳

公山人之  
執友也

送僧之大名府謁長城侍郎

上人能  
琴善詩

東吳舊寺寄巖隈駐錫神州久未迴琴曲誰知流水意



詩篇自占碧雲才廬峰已結白蓮社鄴下暫尋銅雀臺  
仙殿主人偏好事春風鈴閣且徘徊

次韻和李寺丞寄石同院之作

子雲常在草玄臺不覺春風滿眼來聞道後車長載酒  
無因曲水共流杯石渠盡日芸籤擁金谷何時綺席開  
珍重主人偏愛客乞逢休沐便追陪

賀太僕錢少卿直祕閣

幾年宿衛向周廬頻貢文章白玉除纔換月卿歸少列

又來天祿校中書東吳世胄王孫貴北第門闌太僕居  
春草題詩欺謝客上林奏賦慕相如石渠講論應重席  
翠輦巡遊且奉車禁禦風光暮春月影纓看是綴嚴徐

次韻和盛博士喜梅大丞授戶部判官

新來乘傳抵秦川會府須才果峻遷應見流錢從地上  
特聞聚米向君前聲華南國推高士名姓丹臺綴列仙  
每話官曹苦拘束歸家長是夕陽天

次韻和李舍人憶北園尋春之作

謝公別墅枕城闌蕭洒都無紫陌塵五色絲綸貪草詔  
一園桃李阻尋春早朝禁漏猶傳點下直殘陽已滿身  
除是禁煙容洗沐直須偷暇賞芳辰

次韻和閣長李舍人喜薛梁二舍人及予同時  
拜命之什

西垣清切本無倫虛薄將何綴侍臣承露盤高雲際曉  
棲鷄樹綠省中春言成綸綍終非稱室藹芝蘭幸得親  
從此煙霄連步武宸遊長奉屬車塵

次韻和承旨侍郎宿齋太一宮之什

北斗城南太一祠羽人多著九霞衣竹宮肅穆珠旒拜  
華表飄飄鶴馭歸遶殿步虛幢影密登壇酌獻珮聲微  
質明禮畢還臺去廐馬翩翩速似飛

十九哥赴舒州太湖簿仍得假歸鄉

兩舉進士  
不第得學

究出

身

初官佐邑少嗟咨且喜鄉關得告歸松菊門前三徑在  
煙波江上片帆飛松榆舊社雖堪戀星火嚴程不可違

語

莫為棲鸞尚卑屑悔將錦襖換蓑衣

唐蔡京自進士應  
學究科當時有此

酬謝光祿四丈見慶新命之什

武夷歸路苦迢遙延閣官曹正寂寥  
彩鳳銜書俄錫命黃金刻印便懸腰  
紫微署近時當制建禮門深日趨朝  
咫尺天顏曾賜對熒煌台座得為僚  
鬼神清問憂前席松栢深情見後凋  
一曲陽春特相寄慙將木李報瓊瑶

信道人歸西京

道人後唐相國之孫來  
獻其祖所著五書不報

寢丘遺業廢多年衣袂空藏命說篇北闕上書陳祖德  
上林結社會時賢風塵不肯留京邑龍象重歸啟梵筵  
聞有道安雖未識定應談論已彌天

邵奉禮歸鄉

奉禮新  
定人

應制曾親白玉除桐君溪畔是幽居未登王子洛賓歲  
已讀黃香東觀書萬里歸寧承漢詔三牲供膳奉潘輿  
水衡得俸誠堪喜莫便揮金學二疏

史館盛學士以詩相賀因而答之

前年出守縉雲城曾枉驪歌慰遠行今日代言青鎖闥  
又披郢唱見深情側聆九奏都忘味連得雙金自滿籬  
紅藥階前試吟嚼胸中鄙吝一時平

衢州阮比部學士得假歸鄉見過陋止留題詩  
什因以謝之

千騎駸駸赴郡初曾迂旌旆訪吾廬天邊誰識郎官宿  
門外空迴長者車勸酒樽罍應引滿題詩屋壁是親書  
鄉人聞有神仙客遠近爭來看隼旗

致仕朱侍郎歸江陵

侍郎自內署休致

二年分直浴堂門簪筆垂紳奉至尊日過八軌批漢詔  
宴開三殿挹堯樽忽聞抗表干君父切要懸車示子孫  
碧落改官旌舊德黃金加賜見深恩羣公祖道爭飛蓋  
故吏沾襟亦戀軒定是遼東嘆城郭肯同彭澤慮田園  
捧觴莫訴前為壽上馬猶能左屬鞬臨別延英對數刻  
已應博史記嘉言

朱侍郎致仕南歸上特錫宴於玉津園仍詔兩



制三館並預其會以伸祖送輒賦詩美之

征輪軋軋出皇都行路咨嗟賢丈夫天子特令供祖帳  
國門聊且駐驪駒舊僚送別傾三省御醴分甘倒百壺

下詔已聞推異禮乞言猶自渴嘉謨

上特詔荆南官吏  
歲時存問如有章

奏附驛  
以聞

馮公不是沉郎署賀老緣何歸鑑湖明主恩深

若為捨夢魂應繞博山鑪

元道宗弟兄東遊

王謝江東推世胄機雲洛下振才名忽思油幕從知去

便挈勝囊冒暑行高第自須求甲乙嘉招未用赴弓旌  
待看萬里搏羊角即是三秋聽鹿鳴朝彥賦詩爭送別  
藩侯置驛定相迎不知誰啖牛心炙又見清談一座傾

殿院卞侍御赴淮南轉運

卞近自淮南副運  
歸闕為計司判官

莎庭治行推尤異梁苑聲華占上流早是都人避驄馬  
近陪計相運牙籌東南轉粟承新命淮海揚旌到舊遊  
騎置非時陳密啓壺漿幾處望行舟黃金刻印大如斗  
白簡飛霜凜若秋歲滿功成來會課多應便拜富人侯

省中當直即事書懷兼簡閣長李舍人

李公北門之望

稍濃

兩掖深沉大帝居紫微西省掌泥書天閣啟鑰趨朝後  
侍史焚香起草初五吏援毫才患少萬錢分膳食無餘  
鳳池荀令連賓閣騎省潘郎對直廬煙氣霏霏生屋瓦  
雷聲隱隱度宮車滄波滿壁浮蘭橈修竹當軒蔭綺疏  
南牆有董羽畫水舍人李程性懶無堪過叔夜思遲多  
為之贊北軒有竹數百竿病似相如繚垣直北銀臺路拭目看君侍玉除

中伏日省中當直

火雲烘赫臨中伏，青鎖深嚴直右曹。  
吏散階庭時縱步，詩成几案獨揮毫。  
相烏影轉風微起，仙掌陰斜日漸高。  
何處賜冰和郢酒，誰人割炙動鸞刀。  
紫泥封詔防稽緩，寒水浮瓜散鬱陶。  
丞相憂邊稀出沐，延英三刻豈知勞。

七夕

東西燕子伯勞飛，新月如鉤玉露垂。  
河鼓天孫信靈匹，鵲橋星渚有佳期。  
穿針乞巧佇立久，織素成章報答遲。

定與黃姑享偕老晉宮休挿杏花枝

胡祕丞知潯州

蘭臺進秩通閨籍熊軾臨民奉詔條風俗重尋南越志  
鄉關猶隔浙江潮懸知坐嘯謳謠洽更想行春意氣饒  
遠宦逢秋少悲吒潘郎玄鬢恐先凋

次韻和盛太博寄贈閣長宿齋太一宮之什

漢武親祈泰一壇國朝特祭領祠官羽旗搖曳晨曦上  
素瑟淒清夜漏寒駕鶴浮丘應暫下偷桃方朔合留殘

齋居數宿偏蔬食定憶中厨政事餐

次韻和集賢李博士中元日見寄

鳳池容出沐螭舍喜端居罷草芝泥詔閑看紫素書曲  
肱銷永晝行樂遶前除鬢換二毛近林凋一葉初香街  
連甲第席戶望朝車暫別同心友還嗟會面疎

次韻奉和知府溫尚書送致政朱侍郎十六韻  
拜章納祿便歸休祕殿親辭十二旒閣筆罷批丹鳳尾  
拂衣初下六鰲頭非緣荆渚依劉表定欲箕山訪許由

北闕子牟終眷戀南朝安石本風流  
明庭顧遇違三接別墅生涯治一丘  
身健寧煩策鳩杖心閑無復夢刀州  
素風有子堪傳遺禪論將誰共對酬  
白璧賜多應尚在黃金散盡不須留  
人欽雅譽芝蘭馥帝憶嘉言水石投  
祖帳特令開上苑歸帆那肯待高秋

侍郎辭日上令待秋涼即路堅請便

行  
幾程郵驛經濃暑千里山川見舊遊  
已是拋官玉堂署尚思陪宴井幹樓  
時裁奏牘猶規諫旋寫丹經自校讎  
鄉里高門表陰德國朝惇史紀嘉猷  
粉榆舊業須重

葺香火前緣莫廢修歲計將何賞伏臘龍陽千樹木奴  
洲

鄭溥赴汀州判官

家近祝融峰登科遇至公悲秋雙鬢改佐幕十年中食  
藥心常苦占著命未通甌閩路雖遠荆楚俗多同投刃  
應餘地當樽莫暫空援毫如草檄又是愈頭風

次韻和宗人安期見賀恩命之什

分班曉入翔鸞闕直閣旁連浴鳳池彩筆閑批五色詔



好風時動萬年枝  
勒移鍾阜慙歸晚  
稱疾文園恨思遲  
何事吾宗心倍喜  
春塘夢徹寄新詩

早秋

楚客悲秋至庭柯  
一葉凋鶴天驚曉  
露蘭畹怯涼颼團  
扇流塵暗單衣爽  
氣饒江東菰米熟  
歸夢隔寒潮

義門胡生南歸

南國烏衣族東京  
伯始孫一枝須折  
桂六闕舊旌門歸  
思鱸魚膾離筵竹  
葉樽秋風正搖落  
楚客莫銷魂

首座昇大師赴西京知教門事

高論彌天四海聞久為龍象主空門雪峰傳法稱開士  
麟殿談經奉至尊香滿賜衣歸洛社苔封文室寄梁園  
梵書貝葉應携去齋罷與誰相對翻

度支梁諫議請病告以詩寄之

梁深於  
內典

經旬不謁未央宮宴坐將誰笑語同蜀郡相如非避事  
淨名居士欲談空門前賓客窺行馬篋裏方書拾遺錄  
西省舊僚疎會面頓驚鄙吝滿胸中

諸公於石氏東齋宴鄭工部分韻得愁秋浮并

序

古者會友以文賦詩言志良辰美景胥遇幾稀銜杯  
漱醪其樂無量矧石氏二君克承堂構孝謹不衰榮  
陽鄭公傑出士林名聲籍甚以久要之契伸一獻之  
娛而我閣老昌武與二三大夫退食自公方駕而至  
乘秋高會卜夜縱談抵掌盱衡樽罍方洽幾冠側弁  
星漢未斜將何以窮綺席之宴嬉盡金壺之漏刻盍

賦一時之事各陳二雅之言物無遁形咸抽秘思朝  
多君子庶為美談云耳

楚客登臨處離懷重隱憂二毛初入鬢一葉早驚秋旅  
鴈他鄉思悲笳絕塞愁憑何遣羈緒菊蘂滿杯浮

次韻和慎大詹中秋待月寄西掖三舍人之什

涼飈送殘暑秋色望中新天迥迷星斗宵寒待月輪境

同牛渚上詩寄鳳池人僚友東牀客冰清合許親

同舍薛公

即其愛壻也合  
預茲夕之會

成都鳳道人遊終南山謁种徵君

何年出蜀訪南宗，深鎖閑房翠蘚重。  
振錫忽聞遊地肺，題門兼得謁人龍。  
行吟一路高秋月，投宿斜陽遠寺鍾。  
到日彌天清論罷，徧尋紫閣與圭峰。

何大博知晉州

平明東省發魚書，便擁彤襜出上都。  
別酒金英泛籬菊，去程黃葉墮關榆。  
叔孫舊禮妨綿蕝，廉范新歌待袴襦。  
滿腹經綸殊未展，歸來看踐赤墀塗。

孫寺丞知考城縣

府尹溫尚書即孫之座主又薦舉賢良方正

早得東堂桂一枝  
凌雲詞賦漢皇知  
從軍久在紅蓮幕  
對策曾臨白玉墀  
霰雪陪遊應不晚  
絃歌為政莫嫌卑  
春官宗伯大京兆  
喜見門生趨府時

次韻和閣長修書畢退朝下直寄諸學士之什

名園甲第接康衢  
國典新成下直初  
庭竹碧鮮吟不足  
盤飧方丈食無餘  
爐中九轉神仙藥  
案上百函親故書  
仍說顏回今飲酒

閭長近  
日痛飲

秋來寧遣宴遊踈

威道人歸鄉

聞法靈山真佛子馳名南國本詩流  
二林曾有香燈結一鉢因為輦轂遊  
塵土化衣慵駐錫江湖收潦憶歸舟  
何年應制登麟殿犀柄談空對冕旒

弟偁歸鄉

吾家文雅占關西五十年來桂兩枝

自故侍讀尚書十五翁周顯德中登

第至永十六兄饒兩人

突弁後生還可畏簾金素業未應衰江湖

去為思鱸膾霧雨還歸養豹姿摩厲詞鋒莫中輟驚人

專聽一鳴時

史館高司諫紳知華州

諫署纔聞滿歲遷分符便見入秦川  
援毫厭賦梁園雪緩轡閑看華嶽蓮  
竹簡汗青妨約史縑囊封皁且論邊  
三峰洞穴多靈藥莫便拋官去學仙

武夷新集卷二



欽定四庫全書

集部

武夷新集卷三

詳校官監察御史<sub>臣</sub>李陽樞

檢討<sub>臣</sub>何思鈞覆勘

總校官中書<sub>臣</sub>朱鈐

校對官中書<sub>臣</sub>葉葵

謄錄貢生<sub>臣</sub>李幽圖

欽定四庫全書

武夷新集卷三

宋 楊億 撰

詩三 六十九首

送張蛻秀才

許由流寓因相識，歲歷今移十二辰。  
別墅已荒三徑草，

城中舊居常所還，往往自  
從於外邑已無穢矣。

素衣猶化九衢塵。  
懸瓢顏巷安

貧，久泣玉荆山。  
失意頻莫向明時，便招隱重來須醉杏

園春

次韻和翰林師學士贈倫上人新居之什

一逕雨苔深新居雅稱心  
天花飄畫講池草伴春吟  
施食山禽下題門野客尋  
此中堪宴坐何必在雙林

李殿丞知廣濟軍

丞相之弟

鈎盾從來司六尚上林尋見惣三官  
頒條忽去憑熊軾  
賜對還曾近露盤  
民瘼乍求應有術  
天倫少別不成歡  
陶朱舊邑無多遠  
魏闕歸心且自寬

章頻得解後之陝府謁嚴洪二從事

是年閏十二月

春闈猶隔閨逆旅苦栖遑忽爾遊分陝飄然出大梁  
食貧憂桂玉策蹇冒風霜杏苑歸期近棠郊去路長  
幕中逢舊友歲晚在他鄉鷄黍且相對休嗟鬢髮蒼

路學士知河中府

一麾新自海濱還又佩魚符入故關  
千里山河臨劇郡九天鴛鴦別通班  
樓經往聖迴清蹕路接邊夷獻白環  
版籍素多田賦錯干戈初息羽書閒  
從軍上客彫龍藻佐酒妖姬墮馬鬟  
更遣府公吟思發中條新霽碧孱顏

即席賦得筆送宗人大著通判廣州

毫字

著作蓬山局職司華袞襲已能成馬史何況夢江毫金  
勁鷄搖距霜寒兔墮毛歸來批鳳詔弄翰莫辭勞

職方彭負外惟節知韶州

仙經舊得還丹訣郎位高分列宿光太守雙旌指南越  
使君千騎冠東方飲冰清白臨遐俗畫錦輝榮過故鄉  
曾是重華張樂地九韶聞處味應忘

宗人大著令問通判廣州

蘭臺大著作族派共關西南海分憂寄東門叙解携離  
城衝臘雪宿館聽晨鷄畫鷁江波遠鳴騶嶺路迷陸梅  
香已盡越鳥暖初啼入境風生扇行春柳拂堤殺青前  
事在飲水古人齊卧理應多暇無忘寄尺題

冬夕與諸公宴集賢梅學士西齋分得今夕何  
夕探得雲字并序

古者瀟湘之會實重故人西園之遊亦在清夜集賢  
梅君以神仙之胄處典籍之司佐地官之版圖居多

暇日奉穆清之顧問出必詭詞國家以西旅弗庭邊  
烽尚警欲得城郭之要領申命朝廷之俊賢難哉是  
行公中其選且有密旨未遑戒途雖飭使者之車已  
辭會府之政杜門終日端居鮮歡遂用解榻開樽集  
寮案於三署割鮮繼燭申宴樂於一時揮麈清談  
冠屢舞杯盤狼藉星漢傾頽因念夫飲酒者未嘗不  
始於治而卒於亂盍各吟詠以止諠譁於是迭出巨  
題互探難韻構思如湧弄翰若飛至於斷章曾未移

晷藻繡紛錯金石鏗鏘足以知周南變風誠二雅之  
可繼鄭卿言志豈七子之足多顧予非才獲陪高會  
形之序引深所厚顏云耳

今夕知何夕良交會以文燭花寒旋落漏滴遠稀聞酒  
面輕浮蟻歌喉細遏雲明河光未沒候管氣初分玉笛  
梅花怨金爐蕙草焚唯愁曙光發搔首歎離羣

鄭工部陝西隨軍轉運

西鄙欖槍未掃除營中慷慨請行初三軍粒食資心計



一月星郵待捷書宣室喜聞延賈誼茂陵久歎滯相如  
謗言盈篋親曾見反間千金計豈踈遺愛道傍喧竹馬  
先聲塞外懾穹廬馮唐莫歎淹郎署博望還忻擁使車  
隴右行收萬里地關中坐致九年儲牙籌羽檄皆吾事  
才刃飄飄兩有餘

黃從事隨軍

買符來赴調負羽去從軍五夜聞邊角三時看陣雲樽  
前還料敵楯上更攜文手筆人多許須銘寶憲勲

聞李四光丞頻遊北園因有懷寄

漢相沙堤連甲第石家金谷有名園  
雍容陌上臨印騎  
瀲灩齋中北海樽  
過閨已驚春色早  
離城殊少俗塵喧  
無由一寄南窻傲  
相望迢迢西掖垣

次韻和集賢李學士寒食即事之什

九達初旭滿輜輶  
寒食東風二月天  
陌上紆巾誰傲睨  
江邊解佩自嬋娟  
新粧幾處登牆見  
沉醉何人藉草眠  
豪俠追歡殊未足  
歸蹄躑躅夕陽前

和集賢李學士千字詩

千仞谿何險千倉稻已收出騎千里馬醉典千金裘千  
年河誕聖千樹橘封侯千鍾不及亂千錢坐上頭

妹婿黃補下第歸鄉

家風早占無雙譽

君即江夏之後

鄉薦曾居第一流崑嶺本期

爭片玉庖刀誰料失全牛風塵不住梁王苑煙水還依  
楚客舟應負男兒四方志故園歸去莫淹留

黃覺東遊

鄉關迢遞數千里，塲屋蹉跎二十年。  
三獻猶垂卞和泪，幾人先著祖生鞭。  
風塵漫索長安米，禾黍全荒負郭田。  
關外賢豪徧投分，趙囊迴日滿金錢。

樂生歸縉雲

出門西望長安笑，抱璞來求善價沽。  
惟罄囊裝買羣籍，不持刺字謁當塗。  
鱸魚漸熟思歸切，羊酪初嘗得味無。  
送子東還重銷黯，我曾三載守仙都。

慧初道人歸青州養親

兼簡知州李太保

宴坐禪林度幾秋忽思歸養指營丘遙知北海孔文舉  
應重江南湯惠休畏日流金征路遠長松偃蓋舊房幽  
庭闌晨夕供甘外高論彌天不易酬

省中當直書懷呈諸同舍

太微西掖鳳池邊阿閣凌空瓦起煙綵筆時批尺一詔  
直廬深在九重天早朝螭陛爐香近晝寢雞人漏唱傳  
只恐承明難久戀長安桂玉苦相煎

王寺丞借西第避暑因有寄贈

滕公甲第冠神州  
晝日青煙瓦上浮  
南榭薰風偏解愠  
北階萱草更忘憂  
朝迴門閉人疑病  
雨過涼生景似秋  
角枕閒眠支體適  
不知胡蝶是莊周

元道宗下第東遊

元氏昆弟子姪  
五人舉進士

舉宗文雅孰能陪  
須信菰蘆出美才  
失意不勞悲玉璞  
投知應得上金臺  
曉離村店侵殘月  
晝歇津亭避疾雷  
東道諸侯多重士  
融樽處處為君開

李四赴歙州

分直蓬丘未再期江東去去擁旌麾名通南省郎官籍

卷續新安郡政詩

好事者編新安前後太守所賦詩為三卷目之曰新安郡政詩見行於世

虎觀清風留汗簡鵲原高韻憶吹簫故人別後頻南望  
想見森森瓊樹枝

予以縉雲進士周啟明長書呈祕閣黃少卿黃  
頗歎重作詩六韻美之因次韻和酬

縉雲江外郡封略古甌中早被唐虞化已成鄒魯風剖  
符曾出守解榻值名公失意嗟塲藿緘書附塞鴻擲金

才少敢泣玉恨還同後夜蓬山宿知君必薦雄

史館陳太丞知壽州

忽佩魚符下玉京長安廐吏駕車迎淮王舊地餘風物  
太史新書見姓名弩矢前驅殊覺貴河梁執別豈勝情  
小山叢桂圖經古白馬驪駒道路榮鵬海三千須擊水  
隼旟四十且專城長淮月色秋宵好應助詩人思轉清

錢大夫赴并州

太原西北勁兵處地直雲中控定襄六月出師平獫狁



九天選將下文昌車魚辟士應難得詩禮臨戎亦未妨  
緩急羽書須自草平安烽火鎮相望柳營稟畏將軍令  
毳幕懷來塞下羌清嘯肯饒劉越石長纓終係左賢王  
關山萬里邊塵靜亭館三冬朔雪狂笛怨梅花新度曲  
樽傾竹葉淺飛觴禦寒應覺重裘暖料敵懸憂兩鬢蒼  
只待今年凱旋後徵歸論道坐巖廊

次韻和表弟張湜秋霽之什

輕颺習習起青蘋宿霧全開霽色新高閣晴曦射踈牖

虛堂潤氣徹華茵，墊餘巾角曾衝雨。  
晦盡琴徽旋拂塵，楚澤潦收湖水白。  
歸舟遙憶洞庭人。

初秋夜坐

明河如練出城隅，朱火西流暑氣徂。  
顧兔一輪浮月桂，流螢數點入煙蕪。  
迢迢宮漏傳銀箭，淅淅天風下白榆。  
岸幘微吟自忘寐，披衣閒起遶庭梧。

秋日有懷鄉國

長安久客逢搖落，不獨悲秋更憶鄉。  
潘岳二毛行欲變，

金匱要略卷三  
淵明三徑已應荒書裁尺素鴻難托夢遶重湖蝶自狂  
遊宦十年歸未得塵纓却悔濯滄浪

閤門錢舍人知全州

家傳吳越賢王後郡歷瀟湘最上游三殿從來奉宸扈  
一麾今去典方州蟬吟高柳隋堤暮水漲平湖楚澤秋  
入境壺漿填候館上官鐃吹夾華輶山川徧歷騷人地  
宵旰遐分聖主憂應向桑郊停五馬青春太守本風流  
次韻和章頻下第書懷之什

春闈三上敗垂成白雪新吟思轉清脩竹園中曾獻賦  
慈恩塔下未題名禹門燒尾他年事楚客悲秋此日情  
道在不須憂晚達搏風九萬是前程

七夕

金壺漏滴正迢迢靈匹相從在此宵月魄嬋娟烏遶樹  
河流清淺鵲成橋雲輕天上榆花沒風細爐中麝炷飄  
寂寞堪憐觀渡女無眠耿耿望青霄

石硯

磊磊澗中石成形本一拳墨池遺號古筆陣用功偏

筆陣

圖以硯水為城池

得在燕臺側採從崑崙巔剖非藏趙璧鍊合

補媧天偶自他山上來參絳帳前光榮登玉案揮灑助  
花牋注水蟾蜍滴題詩玳瑁筵如何班定遠發憤便輕  
捐

大理趙寺丞世長知益州華陽縣

帝選循良撫遠民由來百里應星辰征車蜀道聞猿苦  
祖帳西郊落葉頻莫為割鷄輕邑宰應須叱馭効忠臣

錦城自古繁華地好與風光作主人

詠醉

劉伶石五斗康成三百杯  
欹斜星弁側鬼戔玉山顏  
人語蜩蟬沸天形帘幕開  
應知是狂藥何不學顏回

筆

月兔湘筠巧製全何人大手稱如椽  
禁中鈴索夜批詔閣上芸香書草玄  
墨妙三分慙入木華裛一字重編年  
史官遺直真堪畏千載獨持生殺權

孫樵云史官持生殺權於千百年後

夜宴

華堂高宴卜良宵賓客當筵半珥貂  
天轉玉繩星落落風傳銀箭漏迢迢  
連浮大白須判平醉促駕鳴騶又趁  
朝月落烏啼人散後衣香數日未能銷

張克下第隨桂陽喬監使之湘中

建溪曾共聽猿聲十載文場未策名  
流落只應孤劍在窮愁已有二毛生  
荊州暫去依劉表漢殿無由薦馬卿  
一路騷人舊山水登臨且莫動歸情

庭榴

得種從西域移根在帝鄉鮮葩猩染血美味蔗為漿入  
獻殊諸果敷榮後衆芳丹房高照日綠葉半凋霜釀酒

扶南國

扶南頓孫國人取石榴汁澆盆中數日成美酒

題詩白侍郎

白刑部詩云唯有安

石榴當軒留寂莫

濃陰蕪茂實相對度炎涼

水部何郎中知鄂州

褰博衣冠漢大儒三千奏牘到宸居郎官起草歸華省  
女史焚香伴直廬出守新恩龜顧印趨朝舊路雉隨車



便分符竹從鸞掖應有壺漿待隼旟賜對移時親斧展  
隨行兼兩載圖書淮南落木搖鞭裏湓浦分風挂席初  
郡閣平窺漢陽樹盤飧頻薦武昌魚聚徒南郡傳經盛  
携妓東山退食餘天闕九重懸夢想江關百戰見坵墟  
清曹祖德詩人後時寄新吟一起予

可久道人之歛州兼簡知郡李學士

獨携餅錫新安去寒雨西風落葉頻江水淺深清見底  
山程高下險摧輪社中香火延開士肘後方書濟俗人

鄉樹再尋南國路，禪房空鎖帝城塵。  
舊傳心印都忘念，自有衣珠豈患貧。  
四衆仰瞻誰見頂，千家應供定分身。  
宰官多結空門友，外護須依守土臣。  
想到臨川逢內史，

翻經相對一頻伸。

內經有師  
頻伸三昧

大理黃丞宗旦使潁州

募民墾田

祥刑新佐張廷尉，出塞曾隨霍冠軍。  
露版裁書頻倚馬，甘泉獻賦舊凌雲。  
幾瞻龍袞堯階側，暫駕星輶汝水濱。  
百萬提封周制復，三千奏牘漢皇聞。  
依蓮幕府遊從近，

聚米山川向背分迴日受釐宣室對又應前席動吾君

劉太丞仲宣歸華山

坐事削除詣闕自陳不報

早年通籍蒼龍闕近日移家仙掌峰方朔上書殊未報  
平津開閣杳難逢騷人章句多懷古陶令田園且養慵  
近郭離筵黃葉滿舊山歸路白雲重洪崖餌術修丹竈  
叔夜援琴對酒鍾應待輓輪徵入覲受釐前席始從容  
表弟章廷評得象知邵武軍歸化縣

幾年索米住京師新得東堂桂一枝宰邑絃歌循吏政

還鄉鷄黍故人期于公陰德知終大萬石家風喜不衰

毛義動容初捧檄太丘積德舊刊碑

得象大父嘗宰  
顏色甚有遺愛

甘

棠二紀民猶愛苦蘗三年吏不欺

此並述先  
正之德

桑梓經過

身畫錦庭闈扶持鬢垂絲元方惠化傳道鐸

得象兄得  
一宰乾化

今為  
隣境

令伯歡心獻壽庖

得象祖母年八  
十餘扶持之任

邦境中分同魯

衛政聲相應似壘麋嘗思竹馬遊從日又見風鵬奮擊

時執手勉君勤素業歸來更直鳳凰池

次韻和李光丞見惠長條之什

貂裘已敝洛陽塵空有陶家漉酒巾  
雙闕金章奉朝請  
小齋紗帽養天真  
久持梵行稱居士  
猶掌王言作侍臣  
惠我長條識君意  
欲教蓮社伴遺民

秋雨有懷李寺丞

潤氣先從柱礎知  
寒霄滴滴助秋悲  
桐圭遶樹多黃落  
苔錦緣階更碧滋  
爽徹衾裯慵就枕  
涼生殘管欲題詩  
高陽舊侶相思否  
此景誰同把酒卮

王廷評臻知廬州舒城縣

臻汝陰人

潁水生賢自古奇西遊聲價滿京師  
梁園獻賦天將雪潘縣臨民賢未絲  
南浦銷魂分袂處北堂獻壽捧觴時  
到官卧治成高趣終日清談吏不欺

大理徐寺丞元榆知越州諸暨縣

子山詞賦動南朝近佐名卿掌玉條  
治邑還持麈尾柄攜家便汎木蘭桡  
謝塘春晝偏多思潘鬢秋風苦未凋  
種秫公田供醕酎彈琴官舍助逍遙  
去程千里隨賓鴈宿館三更聽落潮  
聞道臨安有仙穴莫拋印綬採芝苗

次韻和錢崇班見寄之什

蘋末風輕不動塵  
承明朝罷見閒身  
從容退食收芝檢  
迢遞驅車訪玉人  
酒貫十千那惜醉  
丹封六一已應真  
春塘麗句偏相寄  
傳誦朝來滿搢紳

次韻和錢崇班再寄之什

祖禰勤王國  
史褒傳家自有呂  
虔刀雄豪結客欺  
燕俠  
惻惻悲秋笑楚騷  
奕世勲名金鉞貴  
出羣風格玉山高  
詩中敏手兼無敵  
射落霜鵬釣得鰲

盛京宰單州武成縣

父豫任度支部中  
第任屯田員外

子男印綬諸侯秩鄒魯閭閻太古風  
苑勝遊拋霰雪  
琴臺善政繼絲桐  
征途朔吹貂裘暖  
祖席清歌蟻酒空  
令弟嚴君俱應宿  
時瞻懸象向南宮

次韻和并州錢大夫夕次豐州道中見寄

漢將從天下  
彊兵值月殘  
孤煙戍樓迥  
密雪戰袍乾  
向暮三吹角  
臨風一據鞍  
邊城賴經略  
重取地圖看

董溫其赴淮南幕

工部王尚  
書知揚州



卷三  
歲晏梁園密雪飛出關猶憶弄繡時屬韃正是從軍樂  
挿羽那憂草檄遲陪宴初筵揮玉柄從遊別墅騁金羈  
府公維揚有別墅焉只應偏啖牛心炙自此聲名漢殿知

史館凌職方知廣州

曾任嶺南轉運

番禺出守重漢殿拜恩初華省郎官宿名山太史書剖  
符從瑣闥持節上軺車左顧金龜印前驅畫隼旗由來  
百粵地曾督九年儲卉服要荒外棠陰惠愛餘齋裝天  
子賜封部島夷居羽檄招溪洞壺漿慰里閭國風今已

變民瘼到應除江海思歸否蓬山有直廬

十二月四日大雪就賜近臣宴飲即事

向夕同雲布海涯豐年呈瑞在京華  
相如賦就梁王苑穆滿歌傳阿母家  
農畝三冬偏積潤朝衣六出旋成花  
天恩錫宴醉歸處幾里香街覆玉沙

章琮赴廣州東莞簿

抱璞曾三獻悲秋忽二毛十年嗟不調  
一命尚徒勞互市通蠻貨公田入海濤  
貪泉雖酌飲未肯染脂膏

文慧大師歸蜀

南宗傳法了漢殿賜衣新歸路峨眉雪舊房京洛塵天  
花飄講席海月照吟身誰結香燈社金門貴近臣

大師  
即西

樞給事空  
門之友也

王中庸赴河南鞏縣尉

春風祖席引香醪白馬驪駒草色袍官舍前臨兩京道  
居民半雜五陵豪卑飛碌碌猶棲棘餘地飄飄暫鼓刀  
捧檄初同昔人喜不應搔首歎徒勞

比部朱負外知東明縣

比部以親老上言凡再宰是邑即其故里也

宰邑承顏帝澤優春郊數舍躍驂騑  
弦歌平昔有遺愛桑梓依前訪舊遊  
鄉里歸時榮畫錦庭闈到日潔晨羞  
陶潛未省荒三逕班嗣何因樂一丘  
蘭長謝庭傳賦詠花開潘縣占風流  
薰爐綾被餘香馥省闈沉沉侍史愁  
咸平六年二月十八日扈從宸遊因成紀事二

十二韻

步輦下明光鳴鞘出未央屬車多載酒  
夾道競焚香雲

管飄梅吹蜺旌錯鳥章從臣沙苑馬衛士羽林槍玉輅  
天行健金壺晝漏長光風汎蘭蕙仙霧拂旂常宿雨收  
林薄晨曦豔屋梁閭閻空里巷旄罕隘康莊託乘奉珍  
使先驅執戟郎從橋初轉較憑軾見垂裳暫駐時龍馭  
前臨戲馬場由來講武事所以服遐荒電影流機石鷁  
羣發大黃是日御講武臺觀  
放拋石及發連弩千鈞寧覺重七札豈曾妨  
卒勇如虓虎人觀若堵牆腰鞬晉元帥扈蹕漢諸王聊  
用誇胡客還聞讐鬼方迴輿百里圓錫宴九霞觴射以

騶虞節歌為白雪倡仙山鯨海上御苑斗城旁周鑄歡  
鹿虞韶集鳳凰瑤池春水淥猶誤濯滄浪

僕射李相公宅觀花燭

時納狀元  
王曾為婿

孫閭相君和鼎貴秦樓愛婿坦牀賢東方千騎還居上  
南極三星正在天路入桃源花爛漫橋橫銀漢水漪漣  
乘龍擇對真無比月桂宮中第一仙

竇詠從淮陽軍

故尚書  
儀之子

名題仙籍廣寒宮負羽從軍意氣雄萬石世家標國史

孔璋書檄愈頭風狂翻竹箭春波急滿酌榴花別酒空  
賈佩吳鉤衣楚製柳堤千里躍青驄

廉上人歸天台

廉公與秘閣  
黃少卿相善

舊住赤城華頂峰桂巖芝崦白雲重彌天曾共習鑿齒  
入洛因尋陸士龍寒燭伴吟經臘雪雨花開講過晨鍾  
浮漚一念歸心起本寺房前見偃松

次韻和李寺丞見寄之什

時宿齋太一寺  
丞遠致美膳

雲章承詔祀高穹夜聽空歌宿絳宮正怯龜腸終日內

忽傳鶴信五城中八珍伊鼎鹽梅味

李君相門之後

九夏堯厨

菴蒲風

暄暑之辰頗甚馨潔

苦恨齋居方慎獨朶頤大嚼與誰同

次韻和石巡李端公見寄之什

時立夏宿齋太一宮

首夏修時祭齋居貴洗心神光浮漢時薰吹發虞琴偃  
樹枝成蓋豐碑字有金秘文窺寶籙榮路厭朝簪捉麈  
思嘉話烹魚得好音迴瞻栢臺署佳氣九門深

大理黃丞宗旦通判潁州

曾隨征虜出蕭關又案公田汝水灣南畝萬箱增地利



宗旦奉使汝陰募民墾田近千頃

西清三刻對天顏一麾通守彤襜貴

九棘評刑赤筆開閭里歡迎舊從事隨車雨氣自應還

陳小著從易知邵武軍

奏牘金門奉帝俞平明鸞省剖銅符北堂送喜應占鵲  
南國思歸不為鱸歲月天涯鄉樹老煙波江上客帆孤  
會稽友婿堪羞死邑令今來負弩驅

譯經總持大師致宗之泗上禮塔

早傳心印得衣珠不學聲聞證有餘犀柄屢登三殿講

琅函新譯五天書蓮華塔下焚香去竹箭波間解纜初  
隨順世緣無所住經行宴坐自如如

歐陽使者監和州軍

父以老病出為和州團練  
副使因上言求侍親乃有

是命

新剖牙璋出護軍使車歸養指江濱綵衣楚國老萊子  
白首長安萬石君虎眼波狂征棹急鱸魚膾美壽杯醺  
東南極目無氛祲不假橫戈看陣雲

胡小著克順知泉州惠安縣兼過南昌別墅

平明東簡下蘭臺海縣鳴琴亦滯才厭說風塵住京洛  
貪看雪浪架蓬萊楚江歸思鱸魚膾隨岸離筵竹葉杯  
通德舊居旌闕在遼東鶴馭少徘徊

武夷新集卷三